

NEWSLETTER

OLIMPIJSKOG KOMITETA BiH



No.17 januar/februar 2023



Dragi sportaši i sportski radnici,
Dragi prijatelji,

Godina 2023. je za Olimpijsku porodicu Bosne i Hercegovine počela radno. U siječnju mjesecu je 10 bosanskohercegovačkih sportaša učestvovalo na XVI Europskom omladinskom olimpijskom festivalu koji se održao u italijanskoj regiji Friuli Venezia Giulia.

EYOF je izvrsna platforma za razvoj i motivaciju mladih talenata, koja omogućava prva olimpijska natjecateljska iskustva. Upućujem iskrene čestitke svima koji su se takmičili, a posebno mladim natjecateljima iz karlinga koji su zabilježili povijesni nastup bh. karling tima na međunarodnoj olimpijskoj sceni.

U proteklom periodu OO BiH je intenzivno radio na iznalaženju mogućnosti programa podrške za mlade perspektivne sportaše Bosne i Hercegovine. U veljači mjesecu smo potpisali ugovore

sa deset sportaša iz ukupno osam sportova koji će primati stipendije za mlade olimpijske nade u iznosu od 300 američkih dolara mjesečno u periodu od godinu dana.

Ova godina je predolimpijska godina. Sportaši će se koncentrirati na kvalifikacije za Olimpijske igre Pariz 2024, a Olimpijski odbor BiH će ih podržati u njihovim nastojanjima i podržati da postignu svoje najbolje rezultate, te ostvare njihove i naše snove – prvu olimpijsku medalju za Bosnu i Hercegovinu. U ovoj godini očekuju nas još 4 velika višesportska međunarodna natjecanja: Evropske igre „Krakow-Malopolska“ koje će se održati u Poljskoj, slovenski grad Maribor će ugostiti mlade sportaše iz Europe na ljetnom EYOF-u. Pored ovoga u kolovozu mjesecu bit će održane II svjetske igre na pijesku na Baliju, a u grčkom Heraklionu bit će održana treća edicija Mediteranskih igara na pijesku.

Olimpijski odbor Bosne i Hercegovine je u ovom pripremnom periodu poduzima izvanredne napore kako bi u ovom izuzetno zahtjevnom vremenu uspio organizirati učešće najboljih bh. sportaša na četiri višesportska takmičenja u tekućoj godini bez podrške i bilo kakvog državnog ulaganja u sport i sportski sustav.

Koristimo priliku da se zahvalimo sportskim strukovnim savezima, sportašima i sportskim radnicima na podršci i povjerenju u dostizanju zajedničkog cilja - pronalaženju sustavnog rješenja za financiranje sporta u našoj zemlji. OO BiH će nastaviti sprovoditi kampanju kako bi se trenutni stihijski model financiranja sporta pokrenuo sa nulte tačke.

Na koncu, istaknimo da naše vrijednosti, naša solidarnost, naše jedinstvo i dosljednost – sve to čini Olimpijski pokret u Bosni i Hercegovini tako jedinstvenim i upravo ove vrijednosti su čvrsta osnova na kojoj ćemo svi zajedno odlučno graditi svjetliju budućnost za sve naše sportaše.

Potpredsjednik OO BiH
Marijan Kvesić

OBILJEŽENO 39 GODINA OD ZIMSKE OLIMPIJSKE BAJKE U SARAJEVU 1984. GODINE



Osmog februara prije 39 godina na Olimpijskom stadionu Koševo, tačno u 14:30 sati fanfare su označile početak svečanosti otvaranja ZOI Sarajevo 84. U ime organizatora goste je pozdravio predsjednik Organizacionog komiteta Branko Mikulić, a *Predsjednik MOK-a, Juan Antonio Samaranch, najavio je da će Svijet biti svjedok „velikih Igara“ u Sarajevu i da će to biti najbolje organizovane Igre u istoriji zimskih olimpijada. I zaista, tako je i bilo!* Potom je predsjednik Predsjedništva SFRJ Mika Špiljak i službeno otvorio ZOI.

Olimpijski plamen u veliku buktinju pretvorila je klizačica Sanda Dubravčić, a olimpijsku zakletvu u ime svih učesnika položio je as bijelih staza Bojan Križaj, koji simpatično zaboravlja riječi Olimpijske zakletve što su gledaoci podržali sa velikim aplauzom, te u ime sudija Sarajlija Miodrag Perović. U tom trenutku Sarajevo i Bosna i Hercegovina su bili centar Svijeta. Na ZOI Sarajevo 84, učestvovalo je 1.272 sportista iz 49 zemalja u 39 disciplina. Među armijom sportista je bio i Jure Franko, sa srebrom u veleslalomu, prvom jugoslovenskom kolajnom na Zimskim olimpijskim igrama. Ekipa SFRJ imala je 72 člana, u kojoj su iz Bosne i Hercegovine bili biatlonci Tomislav Lopatić i Zoran Čosić, brzoklizači Behrudin Merdović i Bibija Kerla, bobisti Boris Radenović, Borislav Vujadinović, Mario Franić, Nikola Korica, Ognjen i Zoran Sokolović, Siniša Tubić i Zdravko Stojnić, te sankasji Dajana i Suad Karajica i Dušan Dragojević, koji je na Trebeviću zabilježio do sada najbolji rezultat (16.mjesto) u istoriji bosanskohercegovačkog zimskog olimpiзма.

Kompletan tekst pročitajte na linku [OVDJE](#).



39. GODIŠNJICA ZOI SARAJEVO 1984. GODINE PODKAST SA GOSP. AHMEDOM KARABEGOVIĆEM



Godišnjica XIV zimskih olimpijskih igara Sarajevo 1984 budi posebne emocije i evocira najljepše uspomene.

Ovogodišnje obilježavanje najznačajnije sportske manifestacije bio je povod za razgovor sa gosp. Ahmedom Karabegovićem, tadašnjim generalnim sekretarom Organizacionog komiteta ZOI 84 Sarajevo. Sa gosp. Karabegovićem je razgovarao doc. dr Said Fazlagić, generalni sekretar OK BiH.

Podkast možete pogledati na linku [OVDJE](#) ili klikom na fotografiju. Poslušajte interesantne i manje poznate pojedinosti za zimsku olimpijsku bajku koja je bila stvarnost daleke 1984. godine.



RAZGOVOR SA PREDSJEDNIŠTVOM OK BIH POVODOM ČETVORTE GODIŠNJICE EYOF-a 2019 SARAJEVO I ISTOČNO SARAJEVO



Akademik prof.dr IZET RAĐO
Potpredsjednik Olimpijskog komiteta Bosne i Hercegovine



prof.dr MILANKO MUČIBABIĆ
Predsjednik Olimpijskog komiteta Bosne i Hercegovine



MARIJAN KVESIĆ
Potpredsjednik Olimpijskog komiteta Bosne i Hercegovine

Desetog februara 2023. godine navršilo se 4 godine od kako je u glavnom gradu Bosne i Hercegovine po drugi put zapaljen plamen olimpizma pod sloganom „Stvarajmo zajedno“.

Sarajevo i Istočno Sarajevo, kao i cijela Bosna i Hercegovina, u tih sedam dana, bili su sportski centar mladosti iz 46 evropskih zemalja.

Festival je okupio više od 1.500 mladih sportista koji su se takmičili u osam sportova – alpsko skijanje, biatlon, nordijsko skijanje, snowboarding, umjetničko klizanje, brzo klizanje, hokey i karling.

U razgovoru sa predsjednikom OK BiH prof. dr Milankom Mučibabićem i potpredsjednicima dr sci. Izetom Rađom i Marijanom Kvesićem, poslušajte više o Festivalu od same ideje do konačne realizacije i međunarodnih priznanja za izvrsnu organizaciju XIV zimskog Evropskog omladinskog olimpijskog festivala ([LINK](#)).



OK BiH NASTAVLJA KAMPANJU ZA SISTEMSKO RJEŠAVANJE FINANSIRANJA BOSANSKOHERCEGOVČKOG SPORTA

U skladu sa zaključcima Okruglog stola „Sistemska finansiranje vrhunskog sporta BiH“, koji je Olimpijski komitet Bosne i Hercegovine organizovao u novembru prošle godine, čelnici i predstavnici OK BiH su učestvovali u mnogobrojnim TV emisijama. Gostovanja su upriličena na Televiziji Bosne i Hercegovine, Federalnoj televiziji, Al Jazeera Balkans, N1 Televiziji, itd.

Inicijativu Olimpijskog komiteta BiH za sistemska rješavanje finansiranja vrhunskog sporta u BiH podržali su sportski savezi BiH, vrhunski sportisti i olimpijci Bosne i Hercegovine koji su se priključili i kampanji podrške za rješavanje problematike finansiranja sporta u Bosni i Hercegovini.

Gostovanja na navedenu temu možete pogledati klikom na fotografije u nastavku.



Al Jazeera: gostovanje dr sci. Izeta Rade, potpredsjednika OK BiH na temu finansiranja regionalnog sporta



Federalna TV: gostovanje prof. dr Milanka Mučibabića, predsjednika OK BiH na temu sistemskog finansiranja bh. sporta



N1 Televizija: gostovanje gosp. Marijana Kvesića, potpredsjednika OK BiH na temu sistemskog finansiranja bh. sporta



BHT1: gostovanje članova Izvršnog komiteta OK BiH, prof. dr Branislav Crnogorac i dr Slobodan Grahovac na temu sistemskog finansiranja vrhunskog sporta u BiH



BHT1: gostovanje dr Nihada Selimovića, člana Izvršnog komiteta OK BiH na temu sistemskog finansiranja bh. sporta



Federalna TV: gostovanje doc. dr Saida Fazlagića, generalnog sekretara OK BiH na temu sistemskog finansiranja bh. sporta



OK BIH U POSJETI MINISTRU KULTURE I SPORTA KANTONA SARAJEVO



Olimpijski komitet BiH nastavlja sa aktivnostima rješavanja problema sistemskog finansiranja vrhunskog sporta BiH. Potpredsjednik OK BiH je zamolio ministra Samra Avdića da kao bivši vrhunski sportista koji je imao mnogostruke uloge u sportskim kolektivima i organizaciji višesportskih takmičenja, učini sve da ovih devet zaključaka bude podržano u punom kapacitetu i da se za sport izdvoji 1% na svim nivoima administrativnog organizovanja, pri čemu bi se sa državnog nivoa finansirali isključivo vrhunski sportisti, reprezentacije, Olimpijski i Paraolimpijski komitet BiH.

Također, Ministar je upoznat sa idejom prijateljskih olimpijskih komiteta iz regiona sa kojom bi se nastavio olimpijski san Bosne i Hercegovine, a to je organizacija još jednog velikog višesportskog takmičenja: Svjetske olimpijske igre mladih (Youth Olympic Games – YOG).

Ministar Avdić je po ko zna koji put pokazao empatiju i odlučnost da se napokon riješi finansiranje vrhunskog sporta BiH na sistemski način, a ideju organizacije YOG-a ocijenio je veoma interesantnom i mogućom.

SVEČANI PRIJEM POVODOM PROSLAVE ROĐENDANA NJEGOVOG VELIČANSTVA CARA JAPANA

Ambasada Japana u Bosni i Hercegovini upriličila je svečani prijem 21. februara u hotelu Evropa povodom proslave rođendana Njegovog Veličanstva cara Japana.

Svečanom prijemu prisustvovali su predstavnici Olimpijskog komiteta Bosne i Hercegovine, predsjednik prof. dr Milanko Mučibabić, potpredsjednik gosp. Marijan Kvesić i generalni sekretar doc. dr Said Fazlagić.



Predstavnici OK BiH su ovom prilikom uručili prigodan poklon uz zahvalnost na dugotrajnoj saradnji sa Ambasadom Japana u Bosni i Hercegovini.

DESET STIPENDIJA ZA MLADE OLIMPIJSKE NADE BOSNE I HERCEGOVINE!



Olimpijski komitet Bosne i Hercegovine nastavlja podršku najperspektivnijim sportistima. U proteklom periodu OK BiH je intenzivno radio na iznalaženju mogućnosti programa podrške za mlade perspektivne sportiste Bosne i Hercegovine. Nakon proceduralnih aktivnosti, a na osnovu prijedloga sportskih saveza BiH, evaluacije Komisije za vrhunski sport OK BiH i odlukom Predsjedništva i Izvršnog komiteta OK BiH, deset sportista iz ukupno osam sportova će primati stipendije za mlade olimpijske nade u iznosu od 300 američkih dolara mjesečno u periodu od godinu dana.



Olimpijski komitet BiH, kao nebudžetski korisnik i Udruženje koje je nije nadležno za finansiranje sporta, po ko zna koji put projektno podržava mlade nade i vrhunske sportiste, te jača sportski sistem BiH. Korisnici stipendije za mlade olimpijske nade su: Iman Avdić (plivanje), Jovan Lekić (plivanje), Emina Omanović (atletika), Marija Jokić (taekwondo), Nadina Mehmedović (taekwondo), Mustafa Hebib (džudo), Ali Šljivo (boks), Sara Plakalović (skijaško trčanje), Milivoje Mačar (alpsko skijanje), Ermin Raščić (brzo klizanje).

Olimpijske stipendije za mlade nade, namijenjene su za učešće sportista na trening kampovima, takmičenjima kao i za njihov trenažni proces. Potpisivanju ugovora o stipendiranju prisustvovali su čelnici Olimpijskog komiteta BiH, predsjednik prof. dr Milanko Mučibabić, potpredsjednici dr sci. Izet Rađo i gosp. Marijan Kvesić, kao i članovi Izvršnog komiteta OK BiH.

“Ovo je još jedan značajan doprinos Olimpijskog komiteta BiH našim najboljim sportistima. Značaj ovog projekta je u činjenici da prepoznamo mlade nade, buduće vrhunske seniore i zasigurno olimpijce koji će predstavljati Bosnu i Hercegovinu na nekim od narednih izdanja olimpijskih igara. Iskreno se nadamo da u ovoj podršci i prepoznavanju mladih sportskih nada nećemo ostati usamljeni”, izjavio je prof. dr Mučibabić, predsjednik OK BiH. Više pročitajte na linku [OVDJE](#).

SPORTSKI STRUKOVNI SAVEZI BIH

TAEKWONDO SAVEZ BOSNE I HERCEGOVINE **DINO ŠEČIĆ ICECP – MEĐUNARODNI PROGRAM „INTERNATIONAL COACHING ENRICHMENT CERTIFICATE PROGRAMME”**

Šečić je ove godine bio jedini predstavnik Bosne i Hercegovine, a nominovan je od strane Taekwondo saveza Bosne i Hercegovine i Olimpijskog komiteta BiH nakon višegodišnjeg rada i posvećenosti razvoja sporta. Koordinirao je projektom “Razvoj nacionalnog sportskog sistema” Taekwondo saveza BiH koji je uspješno okončan protekle godine, te je zahvaljujući projektu dobio preporuku i podršku Olimpijske solidarnosti.

Kroz višemjesečno školovanje Šečić je prošao cjeline i stekao dodatna znanja iz oblasti: umjetnost i nauka treniranja, trenersko liderstvo i etički aspekti treniranja, razvoj sportista, sportska psihologija i mentalna priprema, ishrana, sportska fiziologija i dizajn treninga, biomehanika i tehnologija treninga, performanse i dobrobit sportista, te osim diplome stekao 30 ECTS kredita sa univerziteta u Delawareu.

“Zahvalan sam Taekwondo savezu BiH i Olimpijskom komitetu BiH na prilici da pohađam ovaj prestižni program i predstavljam Bosnu i Hercegovinu. Ogromna je čast i zadovoljstvo biti među predstavnicima zemalja iz svih dijelova svijeta i slušati predavanja vrhunskih profesora sa Univerziteta u Delawareu i stručnjaka koji rade za Američki olimpijski tim, kao i drugih čija sam predavanja imao priliku slušati. Stečena znanja sam već počeo primjenjivati u praksi, te vjerujem da ću u budućnosti pomoći još boljem radu i razvoju Taekwondo saveza Bosne i Hercegovine”, istakao je Dino Šečić.



ATLETSKI SAVEZ BOSNE I HERCEGOVINE **MEĐUNARODNI SEMINAR ZA INSTRUKTORE DJEČIJE ATLETIKE U BEOGRADU**



U organizaciji Svjetske atletike i Evropske Atletske Federacije u Beogradu se od 16. do 19.02.2023. održao međunarodni seminar za instruktore dječije atletike, a predstavnik Bosne i Hercegovine bio je Jasmin Gavranović. Dječija atletika je besplatan i uzbudljiv program za pokretanje djece i mladih širom svijeta! Program koristi snagu atletike kako bi inspirirao djecu i mlade, gdje god se nalazili, da budu aktivniji, razviju svoje vještine i samopouzdanje te da se povežu sa sportom za cijeli život.

Teme seminara su bile planiranje treninga u dječijoj atletici, implementacija trenažnog procesa, prilagođavanje aktivnosti uzrastu djece, atletski pokreti kao i uključivanje trenera, profesora i njihova edukacija kako bi što bolje planirali trenažni proces kao i organizaciju takmičenja u dječijoj atletici u vidu raznih atletskih događaja i mitinga.

SKIJAŠKI SAVEZ BOSNE I HERCEGOVINE DOMAĆA I MEĐUNARODNA TAKMIČENJA U ORGANIZACIJI SAVEZA



Skijaški savez BiH, pored svojih domaćih takmičenja u Kupu BiH, održao je i međunarodna takmičenja u proteklom periodu kako slijedi:

- BH Telecom Ilidža FIS Kup, ujedno i Državno prvenstvo BiH u slalomu Bjelašnica, SK Ilidža
- Evropa kup takmičenje super G, alpsko skijanje Bjelašnica, ZOI 84
- FIS CHI Djeca za mir u svijetu, alpsko skijanje Bjelašnica, SK Sarajevo
- Telemach Speed Camp, alpsko skijanje Bjelašnica, SK Olimpik
- FIS Cup Termah, alpsko skijanje Jahorina, SK Jahorina
- FIS Kup Snow Art, alpsko skijanje Jahorina, SK Jahorina-ski
- FIS Kup Bjelasnica, snowboard, SNB Free Style
- FIS Cup Sarajevo, ujedno i Državno prvenstvo BiH u slopestyle i big air snowboard, Bjelašnica, SNB Free Style
- Balkan Cup Biatlon, Dvorišta, SK Romanija
- FIS Kup Igman, ski trčanje Igman, SK Širokača
- FIS Kup Dvorišta ski trčanje, SK Romanija
- FIS Balkan Kup, ski trčanje Dvorišta, SK Sarajevo-Istočno Sarajevo

Od posebnog značaja je bila organizacija Evropa kup takmičenja, nakon više od 30 godina Savez je ugostio najveće skijaške nacije: Austrija, Njemačka, Italija, Švicarska, Kanada, USA, Francuska, Norveška, BiH. Takmičenje se održalo u disciplini Super G u organizaciji OC Bjelašnica.



DŽUDO SAVEZ BOSNE I HERCEGOVINE USPJEŠNO ODRŽAN „ZIMSKI DŽUDO KAMP“ U ZVORNIKU



Regionalni džudo kamp-seminar za takmičare, sudije i trenere, održan je u Zvorniku od 27 – 29. januara 2023. godine, uz učešće eminentnih stručnjaka i specijalista iz navedenih džudo oblasti.

Predsjednik Olimpijskog komiteta Bosne i Hercegovine prof. dr Milanko Mučibabić je pozdravio prisutne u ime Olimpijske porodice BiH, te uručio prigodne poklone. Predsjednik OK BiH je iskoristio priliku da se zahvali

organizatorima, Džudo savezu BiH, te domaćinima Ognjenu Pavloviću i Draganu Božoviću na odličnoj organizaciji tradicionalnog džudo kampa.



SAVEZ KLIZAČKIH SPORTOVA BOSNE I HERCEGOVINE SARAJEVO TROPHY 2023 I PRVENSTVO BIH



U organizaciji Saveza klizačkih sportova Federacije Bosne i Hercegovine, u Dvorani Mirza Delibašić (Skenderija) je održano međuklupsko takmičenje u umjetničkom klizanju „Sarajevo Trophy 2023“, koje je ujedno bilo i Državno prvenstvo Bosne i Hercegovine u umjetničkom klizanju. Na takmičenju je nastupilo više od 100 klizača iz Hrvatske, Slovenije, Srbije, Ukrajine i Bosne i Hercegovine. Ove godine Sarajevo je prvi put bilo domaćin i kategorijama za odrasle (Adult).

Najviše medalja osvojili su klizači iz Hrvatske (18).

Na Državnom prvenstvu Bosne i Hercegovine nastupili su klizači u svim kategorijama. Prvaci Bosne i Hercegovine (po kategorijama) su:

Zara Husedžinović (seniori), Lana Galijašević (juniori), Ayla Kadribašić (Advanced Novice), Eva Sužnjević (Intermediate Novice), Sara Mujčić (Basic Novice), Ada Korić (Cubs), i Alina Borovac (Chicks). Klupski prvak Bosne i Hercegovine za sezonu 2022/23 je treći put zaredom Klub sportova na ledu “Unity” Sarajevo.

SPORTSKO RIBOLOVNI SAVEZ BOSNE I HERCEGOVINE **DOMAĆINI 20. SVJETSKOG PRVENSTVA U RIBOLOVU - DISCIPLINA FLY-FISHING**



Sportsko ribolovni savez Bosne i Hercegovine bit će domaćin 20. Svjetskog prvenstva u ribolovu u disciplini Fly-fishing. Takmičenje će se održati od 16. do 24. jula 2023. godine na rijeci Buni u Blagaju, Mostar.

Iz Sportsko ribolovnog saveza BiH ističu da na ovoj manifestaciji očekuju učešće zemalja iz cijelog svijeta sa oko 300 takmičara i pratećeg osoblja.

“Sigurni smo da će ovo takmičenje proteći u najboljem redu i da ćemo još jednom pokazati sve ljepote države Bosne i Hercegovine, jer smo do sada uspješno organizovali četiri Svjetska i jedno Evropsko prvenstvo”, saopštili su predstavnici Saveza.

BOĆARSKI SAVEZ BOSNE I HERCEGOVINE **DOMAĆINI EVROPSKOG PRVENSTVA 2023**



Boćarski savez BiH ove godine organizuje Evropsko prvenstvo u boćanju, koje će se održati u Grudama od 03. do 08. oktobra 2023. godine.

Očekuje se nastup predstavnika 20 evropskih zemalja. Boćarski savez će uložiti maksimalan trud za uspjeh u organizacijskom smislu i natjecateljskom segmentu, kojim žele predstaviti Savez i zemlju kao dobre domaćine međunarodnih takmičenja.

BH • TEAM

EYOF FRIULI VENEZIA GIULIA 2023 UČEŠĆE BIH TIMA NA XVI ZIMSKOM EVROPSKOM OMLADINSKOM OLIMPIJSKOM FESTIVALU



XVI po redu zimski Evropski omladinski olimpijski festival (EYOF) održan je od 21. do 28. januara 2023. godine u regiji Friuli Venezia Giulia. Ovo je bio drugi put za Italiju da je domaćin zimskog festivala nakon Aoste 1993. godine. Pored Italije, takmičenja su održana u Austriji i Sloveniji.

Sportisti iz 47 zemalja Evrope, uzrasta od 14 do 18 godina će se takmičiti u 14 zimskih sportova koji su na programu Festivala.



Bosnu i Hercegovinu je predstavljalo 10 sportista u pratnji 4 trenera u 5 sportova: alpsko skijanje, biatlon, ski trčanje, umjetničko klizanje i karling.

Svečana ceremonija otvaranja je održana na Trgu Ujedinjenja Italije u Trstu, a bosanskohercegovačku delegaciju su na svečanom defileu predvodili nosioci zastave Tarik Zuhrić i Lana Galijašević.

REZULTATI BIH TIMA EYOF FVG 2023

Alpsko skijanje

Tarik Zuhrić: slalom 62. mjesto;
Ina Likić: slalom 42. mjesto;

Biatlon

Boris Stanojević: 7.5 km sprint 51. mjesto; 12.5 km Individualno 36. mjesto
Aleksandar Klačar: 7.5 km sprint 67. mjesto; 12.5 km Individualno 67. mjesto

Skijaško trčanje

Melika Jažić: 5km slobodni stil 65. mjesto; sprint 64. mjesto

Umjetničko klizanje

Lana Galijašević: 29. mjesto

Karling mješoviti tim

Ana Klepić, Marija Savić, Mihajlo Ignjić, Aleksa Cincar: 14. mjesto



Udine su bile domaćin svečane ceremonije zatvaranja 28.01.2023. godine.

Zastavu Bosne i Hercegovine na ceremoniji zatvaranja nosili su sportisti sa najbolje ostvarenim rezultatima tokom petodnevnog takmičenja: Boris Stanojević (biatlon) i Ina Likić (alpsko skijanje). Čestitke našim mladim nadama i sretno u nastavku sportske karijere.

ISTORIJSKI NASTUP KARLING TIMA BOSNE I HERCEGOVINE NA VIŠESPORTSKOM MEĐUNARODNOM TAKMIČENJU

EYOF 2019 je najveće sportsko takmičenje organizovano u Bosni i Hercegovini, nakon Zimske Olimpijade 1984. godine. Održano je u periodu od 9. do 16. februara 2019. godine. Vizionarski koncept i sama ideja za organizaciju EYOF-a u Sarajevu i Istočnom Sarajevu potekla je od članova Predsjedništva Olimpijskog komiteta BiH (gđin.Siniša Kisić, gđin. Marijan Kvesić i akademik prof.dr Izet Rađo) još 2007. godine.

9. februara 2019. godine pod sloganom “We create together” - Stvaramo zajedno održana je veličanstvena ceremonija otvaranja zimskog EYOF-a Sarajevo i Istočno Sarajevo, kao najveće sportske manifestacije poslije Zimskih olimpijskih igara održanih u našem glavnom gradu 1984. godine.

Više od dvije hiljade sportista, trenera, službenih lica, članova delegacija iz 46 evropskih država boravilo je u olimpijskom Sarajevu od 9. do 16. februara 2019. godine i branilo boje svoje domovine.

Na programu Festivala je bilo osam sportova od kojih je jedan bio karling.

Bio je ovo značajan momenat za sve sportiste i gledaoce, a posebno ljubitelje karlinga.

U Bosni i Hercegovini do održavanja EYOF-a 2019 karling je bio nerazvijen i nepoznat sport i u tom trenutku nije postojao niti jedan karling klub.

Prvi zvanični sastanak na temu karlinga je održan u Ljubljani 2013. godine u hotelu Union sa Generalnim sekretarom Karling saveza Slovenije Gregorom Riglerom na kome su prisustvovali Predsjednik Olimpijskog komiteta Bosne i Hercegovine Siniša Kisić i generalni sekretar doc. dr Said Fazlagić.

Organizacioni odbor EYOF-a 2019 je zadužio gosp. Mira Klepića koji je do tada bio odgovoran za alpsko skijanje da kao sportski entuziasta sa svojim kolegama i prijateljima zajedno organizuje karling takmičenja koji su se održavala na Palama u sportskoj dvorani Peki.



Uz pomoć naših prijatelja iz Evropskog olimpijskog komiteta na EYOF-u Sarajevo i Istočno Sarajevo uspješno su održana takmičenja i nakon toga formirano je nekoliko klubova, a 2021. godine uz veliku podršku Olimpijskog komiteta Bosne i Hercegovine osnovan je Karling savez BiH.

ISTORIJSKI NASTUP KARLING TIMA BOSNE I HERCEGOVINE NA VIŠESPORTSKOM MEĐUNARODNOM TAKMIČENJU



31.03.2022. godine Karling savez BiH je postao punopravna članica Olimpijskog komiteta Bosne i Hercegovine, te se kao 39. član priključio ovoj velikoj Olimpijskoj porodici. Olimpijski komitet BiH pod svojim okriljem ima 30 članica olimpijskih i 9 članica neolimpijskih sportova.

Osnivanjem Karling saveza BiH, Olimpijski komitet BiH i zimski sportovi u BiH su dobili novu članicu kao i nove mogućnosti bavljenja zimskim sportovima i stvaranju novih vrhunskih sportskih rezultata i medalja.

Četiri godine nakon održavanja EYOF-a Sarajevo i Istočno Sarajevo sportisti iz karlinga svoje treninge održavaju na ledenoj plohi – Zetra, gdje su se pripremali za svoj prvi istorijski nastup na olimpijskom takmičenju EYOF Friuli Venezia Giulia 2023. Bh karling tim na 16. zimskom EYOF-u su činili mladi sportisti Ana Klepić, Marija Savić, Mihajlo Ignjić i Aleksa Cincar, te trener Vladan Savić uz veliku podršku Predsjednika i jednog od osnivača Karling saveza BiH gosp. Mira Klepića.

Nastup Ane, Marije, Mihajla i Alekse će ostati zabilježen kao sjajan primjer značaja i vrijednosti olimpijskog naslijeđa, potvrđujući slogan da brže, više i jače možemo postići samo zajedno.

Našem karling timu čestitamo na debitantskom nastupu i želimo puno uspjeha i sportske sreće u budućnosti.

ALPSKO SKIJANJE | SJAJNA SEZONA ELVEDINE MUZAFERIJE



Najbolja bh. skijašica olimpijka Elvedina Muzaferija je ostvarila sjajne rezultate početkom godine.

U disciplini Super-G za žene u okviru Svjetskog kupa St. Anton osvojila je 28. mjesto sa vremenom 1:23.20, dok je u disciplini spust na Svjetskom kupu Cortina d'Ampezzo zauzela 28. poziciju sa vremenom 1:06,37.

Na utrci Europa kupa u francuskom skijalištu Chatel olimpijka Muzaferija osvojila je 10. i 13. mjesto u disciplini spust. U utrci super veleslalom, Elvedina je bila devetnaesta, što je pozicioniralo na 40. mjesto Europa kupa u navedenoj disciplini.

Elvedina Muzaferija ostvarila je najbolji rezultat bh. skijanja u istoriji svjetskih prvenstava osvojivši 15. mjesto sa 7.59 sekundi zaostatka za pobjednicom Federicom Brignone, čime je nadmašila svoj najbolji rezultat na svjetskim prvenstvima - 16. mjesto u Cortini D'Ampezzo od prije dvije godine.

Nakon odličnih rezultata, Elvedina Muzaferija je osvojila i prvi podijum u karijeri u Evropa kupu osvojivši srebrnu medalju. U disciplini spust u okviru Evropskog kupa koji se održao u Crans-Montani, Švicarska, Muzaferija je utrku završila sa vremenom 1:11.88 i imala svega dvije stotinke slabije vrijeme od prvoplasirane i pobjednice Nadine Fest iz Austrije. Čestitamo!



FOTO izvor: [Facebook Elvedina Muzaferija](#)

SANKANJE | MIRZA NIKOLAJEV I HAMZA PLEHO



Bosna i Hercegovina je po prvi put u ovoj sezoni imala dva seniorska predstavnika u sankanju. Mirza Nikolajev i Hamza Pleho osvojili su prve bodove u sklopu Svjetskog kupa u austrijskom Insbrucku.

Nakon prvih bodova olimpijac Mirza Nikolajev se odličnim nastupom u Altenbergu kvalifikovao u finale Svjetskog kupa, u kojem je zauzeo 28. poziciju. Na posljednjoj, devetoj utrci

koja je vožena u Winterbergu, Nikolajev je zauzeo 25. mjesto, dok je Pleho zauzeo 27. mjesto.

Pod rukovodstvom trenera Senada Omanovića, na kraju sezone Svjetskog kupa, Mirza Nikolajev je zauzeo 30. poziciju, a Hamza Pleho 34. poziciju u konkurenciji svjetskih sankša.

SNOWBOARD | ASJA KLAČAR NASTUP NA SVJETSKOM KUPU

Prvi nastup na svjetskom kupu u snowboardu i već prvi bodovi za našu borderku Asju Klačar, devetnaestogodišnju (19) takmičarku iz Sarajeva.

U austrijskom Kreischbergu 14. januara 2023 Asja Klačar je ispisala historiju bh. snowboarda. U disciplini Big Air Asja Klačar je zauzela 22. mjesto, osvojivši 9 bodova u svjetskom kupu.

Asja Klačar je zaslužna što se po prvi put na Svjetskom kupu u društvu najelitnijih nacija u snowboardu zavijorila i BiH zastava, te upisali prvi bodovi.

Vjerujemo da je ovo samo početak Asjinih nastupa na najvećim takmičenjima u snowboardu, te veliki motiv za još bolje rezultate.



BRZO KLIZANJE | TARIK OMERAGIĆ | SVJETSKI KUP DORDRECHT

Seniorski reprezentativac Bosne i Hercegovine u brzom klizanju, Tarik Omeragić, nastupio je na Svjetskom kupu koji je održan od 10. do 12.02., u Dordrechtu (Nizozemska).

U konkurenciji najboljih brzoklizača svijeta, Tarik je na 1000 metara zauzeo 33. mjesto, a na 1500m zauzeo je 36. mjesto. Nakon Svjetskog kupa, Tarik se u Francuskoj priprema za Svjetsko prvenstvo u brzom klizanju koje će se održati od 10.03 do 12.03.2023. u Seulu.



USPJEŠNA SEZONA JUNIORSKOG REPREZENTATIVCA U BRZOM KLIZANJU RAŠČIĆ ERMINA



Juniorski reprezentativac Bosne i Hercegovine u brzom klizanju, Ermin Raščić, nastupio je na Alpe Adria Trophy 2022 – Serbia Open, koje je održano u Beogradu. Na ovom međunarodnom takmičenju na kome su nastupili brzoklizači iz 7 zemalja (Srbija, Slovenija, Hrvatska, Slovačka, Mađarska, Njemačka i BiH), Raščić je imao dobar nastup. Osvojio je drugo mjesto i srebrnu medalju.

Nakon osvajanja srebrene medalje, Ermin Raščić je nastupio na međunarodnom takmičenju “Santa Claus cup” koje je održano u Budimpešti. U konkurenciji 100 takmičara iz devet zemalja, Ermin Raščić je u kategoriji Juniori A zauzeo 8. mjesto. U disciplini 500 m, isklizao je vrijeme 47,5 s, kojim je ostvario zadanu normu definisanu pravilima Međunarodne klizačke unije (ISU) i Pravilnikom Saveza klizačkih sportova BiH i obezbijedio nastup na Juniorskom svjetskom prvenstvu na kojem je nastupio od 27. do 29. januara 2023. godine u Dresdenu (Njemačka), gdje je u konkurenciji 68 najboljih brzoklizača svijeta, u trci na 1.500 metara osvojio 44. mjesto, a u disciplinama 500 i 1000 metara je imao lošiji rezultat zbog pada.

“Cilj koji želim da ostvarim su Olimpijske igre 2026 koje će biti održane u Milanu Kortini. Uz pomoć olimpijske stipendije uspjeh ću obezbijediti dio priprema na ledu. Ovom prilikom se zahvaljujem Olimpijskom komitetu koji je prepoznao moj rad i trud i podržao me stipendijom za mlade olimpijske nade”, izjavio je Ermin Raščić.

ATLETIKA | AMEL TUKA



Bosanskohercegovački srednjeprugaš, olimpijac Amel Tuka osvojio je drugo mjesto na svojoj prvoj utrci u 2023. godini na Czech Indoor Gala mitingu u Ostravi, istrčavši vrijeme 1:48,09.

Nakon drugog mjesta u Ostravi, Tuka je osvojio prvo mjesto u utrci na 800 metara, na dvoranskom prvenstvu u Dortmundu. Bh. atletičar je kroz cilj prošao s vremenom 1.47.02, čime je postavio rekord mitinga za pet stotinki. U nastavku sezone najbolji bh. atletičar je osvojio i treće mjesto u utrci na 800 metara u francuskom gradu Lievin, te četvrto mjesto na mitingu u Madridu.

ATLETIKA | MESUD PEZER

Nakon završenih zimskih priprema, Mesud Pezer je ostvario treću poziciju na prvom turniru u 2023. godini u Luksemburgu tj. na međunarodnom atletskom turniru „Indoor Tour Bronze CMCM“.

Na narednom takmičenju, atletskom mitingu “Orlean Cup” u poljskom gradu Lodz, Pezer je hicem dužine 20.75 metara osvojio drugo mjesto.

“Zadovoljan sam današnjim nastupom, posebno činjenicom da sam najbolji hitac bacio u zadnjoj seriji, i u tom trenutku s četvrte pozicije dospio do druge, na ovom atletskom mitingu”, izjavio je Pezer povodom njegovog novog uspjeha.



ATLETIKA | EDHEM VIKALO



Na Prvenstvu Mediterana U23 (Valencija) u dvorani najbolji bosanskohercegovački sprinter i član AK “Sloboda Tehnograd” Edhem Vikalo ostvario izvanredan rezultat osvojivši 2. mjesto i srebrnu medalju što je njegov najveći uspjeh. Pored osvojene medalje Vikalo je postavio i novi seniorski državni dvoranski rekord na 60m sa rezultatom 6,73.

U polufinalnoj trci Vikalo je postavio i dvoranski rekord Mediterana za mlađe seniore u vremenu od 6,76 da bi ga već u finalu poboljšao Francuz William Aguessy istrčavši 6,71.

Čestitke našim atletičarima i sretno u nastavku sezone!

TAEKWONDO | NEDŽAD HUSIĆ I ADA AVDAGIĆ



Najbolji bh. taekwondoista Nedžad Husić osvojio je zlatnu medalju na Slovenia G1 turniru. Nedžad je savladao predstavnike Kazahstana, Slovenije, Belgije sa 2:0, a u finalnom meču bio je bolji od predstavnika Hrvatske sa 2:1, te tako osvojio zlatnu medalju i 10 novih bodova na ranking listi.

Na turniru je nastupila i Ada Avdagić koja je učestvovala u kategoriji do 53kg. Iako nije osvojila odličje, Ada je zabilježila vrijedne bodove za svjetsku seniorsku rang listu.

PLIVANJE | OSAM MEDALJA ZA LANU PUDAR I JOVANA LEKIĆA NA 21. MEĐUNARODNOM PLIVAČKOM MITINGU "ZPK 2023"



Na 21. međunarodnom plivačkom Mitingu "ZPK 2023", stipendisti OK BiH Lana Pudar i Jovan Lekić ostvarili su odlične rezultate.

Lana Pudar je zabilježila nastup u četiri discipline 50, 100, 200 metara delfin i u disciplini 100 metara slobodno, gdje je osvojila četiri prva mjesta, osvojivši pehar za najbolju plivačicu mitinga u kategoriji juniora.

Jovan Lekić je također učestvovao na međunarodnom plivačkom mitingu u Zagrebu, osvojio je tri zlatne medalje i jednu srebrnu, te je zahvaljujući izuzetno vrijednim rezultatima u disciplinama 400m mješovito i 200m kraul proglašen i za najboljeg i najuspješnijeg plivača u seniorskoj konkurenciji.

Ovi rezultati su odličan uvod za ostvarenje normi za ljetne olimpijske igre "Paris 2024". Kvalifikacioni period počinje od 01.03.2023., pred Lanom i Jovanom je veliki broj svjetskih i evropskih takmičenja te im želimo puno uspjeha i sportske sreće.

DŽUDO | LARISA CERIĆ MEĐU 7 NAJBOLJIH NA GS U TEL AVIVU

Krajem februara u Izraelu je održan Grand Slam kao jedno od takmičenja sa najjačim rejtingom na svijetu, na kojem je učestvovalo 398 takmičara iz 52 zemlje.

Larisa je zauzela sedmo mjesto sa pobjedama nad predstavnicima Litvanija i Italije, Jablonskyte Sandra i Tavano Asye, dok je u trećem kolu zadobila povredu protiv domaćina Izraelke Hershko Raz, luksaciju prsta na ruci i spriječena je da nastavi njen pohod ka medalji. Ipak sa 260 novih bodova koliko je osvojila na ovom takmičenju već se nalazi među sportistima koji su u olimpijskoj normi.

Osim olimpijke Larise Cerić, na Grand Slam-u su nastupili i Aleksandra Samardžić, Anđela Samardžić i Toni Miletić. Pored Larise Cerić koja je trenutno u normi za OI Paris 2024, Aleksandra Samardžić se također nalazi u kontinentalnoj kvoti, te istu mora zadržati u narednom periodu.



DŽUDO | ALEKSANDRA SAMARDŽIĆ DRUGA NA EVROPA OPEN



Aleksandra Samardžić, džudo reprezentativka Bosne i Hercegovine osvojila je drugo mjesto, srebrnu medalju na Europa Open Sofija u kategoriji do 70 kg, koje je ujedno kvalifikacijsko takmičenje za Olimpijske igre Pariz 2024. Na takmičenju su nastupili sportisti iz 43 zemlje svijeta. Aleksandra Samardžić u kategoriji do 70 kg bila je jedna od nositeljica turnira, tako da je u prvom kolu bila slobodna, a u drugom kolu je savladala predstavnicu Francuske, a u četvrtfinalu je bila bolja

od domaće predstavnice i u polufinalu savladala predstavnicu Ukrajine. Aleksandra se u finalnoj borbi sastala sa svojom starom protivnicom Szabinom Gerczak iz Mađarske koju ovog puta nije uspjela pobijediti.

Na Europa Open-u odlične plasmane napravili su Božidar Vučurević koji je u kategoriji do 81 kg. ostvario plasman među 5 najboljih, dok su Anđela Samardžić do 57kg i Toni Miletić do 90kg zauzeli sedma mjesta.

BiH reprezentativci su odličnim nastupom na Europa Open-u u Sofiji ostvarili nove bodove za Svjetsku i Olimpijsku ranking listu, te očekujemo da nastave sa dobrim rezultatima na predstojećim turnirima.

TENIS | ATP TURNIR ADELAIDE | TOMISLAV BRKIĆ



Bh. reprezentativac Tomislav Brkić je u paru sa Gonzalom Escobarom iz Ekvadora izborio plasman u polufinale dubla na ATP turniru u Adelaidu.

Nakon pobjeda nad Đokovićem i Pospisilom na startu turnira, te u drugom kolu nad drugim nosiocima Arevalom i Rojerom, Brkić i Escobar su u četvrtfinalu savladali Juana Sebastiana Cabala i Roberta Faraha iz Kolumbije.

Ipak u meču za plasman u finale bolji su bili britansko-australski par Jamie Murray/Michael Venus.

TENIS | AMAJLA KADRIĆ POBJEDNICA TURNIRA “DUBAI BOWL 2023”

Bh. teniserka Amajla Kadrić, članica Teniskog kluba Bosna iz Sarajeva, osvojila je prvo mjesto na turniru “Dubai Bowl 2023” u kategoriji do 10 godina.

Radi se o turniru iz serije “TEN-PRO Global Junior Tour” na kojoj se takmiče najtalentovaniji teniseri i teniserke svijeta od U10 do U16 kategorije, a Kadrić je bila jedina predstavnik Bosne i Hercegovine.

Amajla je titulu osvojila pobjedom nad Ruskinjom Arinom Čurajevom sa rezultatom 6:4, 6:0.

Trenutno je prva na rang listi teniskog saveza Bosne i Hercegovine do 10 godina.



KARATE | ČETIRI MEDALJE ZA BIH NA OMLADINSKOM PRVENSTVU EVROPE LARNACA 2023

Na Evropskom prvenstvu za kadete, juniore i U-21 Larnaca 2023, Bosnu i Hercegovinu su predstavljala 33 takmičara, a bh. tim je osvojio ukupno četiri medalje.

Nejra Sipović se okitila zlatnim odličjem u kategoriji - 55 kg, čime je postala prvakinja Evrope U21 u borbama.

Srebro su osvojili Anes Bostandžić (borbe U21 +84 kg) i Ali Arnautović (borbe kadeti -57 kg), dok je bronzanu medalju osvojila Marina Kurteš (borbe juniorke -61 kg).

Zapažene rezultate ostvarili su i Mahir Džuho 5. mjesto (borbe U 21 - 84 kg), Omar Halilović 7. mjesto (borbe juniori + 76 kg), Kaja Topić 7. mjesto (borbe kadetkinje + 61 kg), Tarik Salkić 9. mjesto (borbe juniori - 68 kg).

Karate reprezentacija BiH je sa jednim osvojenim zlatom, dva srebra i jednom bronzom u ukupnom plasmanu zauzela 12. mjesto u konkurenciji 48 zemalja!



POWERLIFTING | JOŠ JEDNA MEDALJA ZA SEJFU ŠEHOVIĆA

Potpredsjednik Olimpijskog komiteta Bosne i Hercegovine akademik Izet Rađo ugostio Sejfu Šehovića koji se nedavno vratio iz Las Vegasa (SAD) sa takmičenja Mister Olympia. Radi se o najprestižnijem svjetskom takmičenju u powerliftingu za čije se učešće neophodno kvalifikovati se na međunarodnom nivou.

OK BiH čestita gospodinu Šehoviću na osvojenoj medalji i kao olimpijska porodica ponosni smo na njegove vrhunske rezultate. Powerlifting nije olimpijska disciplina, ali mi iz sporta znamo da je jedan od najzahtjevnijih sportova za koje je neophodan dugotrajan i mukotrpan trening.

Zahvaljujemo se gospodinu Šehoviću što se u Las Vegasu vijorila bosanskohercegovačka zastava na najvišem postolju i očekujemo da će nivoi vlasti zaduženi za sport prepoznati i finansijski podržati sve one koji vrhunskim rezultatima afirmišu državu Bosnu i Hercegovinu.



ALPINIZAM | TOMISLAV CVITANUŠIĆ KREĆE U POHOD NA MOUNT EVEREST: FOKUSIRAN SAM NA MENTALNI TRENING



Bosanskohercegovački alpinista, triatlonac i ironman Tomislav Cvitanušić na jednu od najizazovnijih ekspedicija odlazi 31. marta, a planirano je da se vrati 3. juna 2023. godine

“San svakog visokogorca je da se jednom u životu popne na najviši vrh, na krov svijeta Mount Everest. Da bi to uradili moramo biti dobri đaci, ne smijemo preskakati razrede. Ako smo u Sarajevu, moramo početi

s Trebevićem i polako, planinu po planinu. Poštovati sve zakonitosti takvog životnog putovanja jer je to životno ostvarenje i cilj svakog alpiniste”, rekao je Cvitanušić.

Više možete pročitati na linku [OVDJE](#).

EU PROJEKTI

PROJEKAT „SPORT KAO VRIJEDNOST“

SPORTS AS VALUES

AIMS TO BUILD THE CAPACITY OF SPORTS CLUBS, ORGANIZATIONS AND FEDERATIONS TO INTEGRATE POSITIVE VALUES IN SPORTS PRACTICE AT THE GRASSROOTS LEVEL



Funded by
the European Union



Projekat „Sport kao vrijednost“ će promovisati i integrisati pozitivne vrijednosti sportskih aktivnosti unutar Balkana.

Početakom 2023. godine, projekat „Sport kao vrijednost“ koji finansira Erasmus+ pokrenuo je dvogodišnje putovanje u kojem su se zemlje iz regiona Balkana i Evropske unije udružile radi zajedničkog cilja; integritati pozitivne vrijednosti u sportsku praksu i izgraditi jače zajednice kroz sport i promociju vrijednosti EU.

Zemlje učesnice : Italija, Kosovo, Bosna i Hercegovina, Crna Gora, Albanija, Malta i Portugal. Projekat Sport kao vrijednost ima dva glavna cilja:

Prvo, izgraditi kapacitet sportskih klubova, organizacija i saveza da integrišu pozitivne vrijednosti u sportsku praksu na osnovnom nivou na strukturiran, dinamičan i sistematičan način. Drugo, izgraditi jače zajednice i mirna društva kroz sport i promociju vrijednosti EU u historijski fragmentiranom regionu.

Zajedničke aktivnosti će početi na Olimpijski dan (23. juna 2023.) u Crnoj Gori, a nastavljaju se sa aktivnostima na Kosovu, u Bosni i Hercegovini i Albaniji do Evropske sedmice sporta u septembru 2024. godine.

Projektni partneri se nadaju stvaranju održivih, dugotrajnih partnerstava u regionu Balkana, sa vještim i obrazovanim organizatorima koji će uspješno promovirati pozitivan uticaj sporta i vrijednosti u sportu koji će rezultirati jačim, mirnijim i povezanim društvima.

OLIMPIJSKI KOMITETI EU U VELIKOJ MISIJI KLIMATSKIH PROMJENA



S ponosom najavljujemo da je Olimpijski komitet Bosne i Hercegovine dio velike porodice Olimpijskih komiteta iz EU (18 partnera), Internacionalnog olimpijskog komiteta (IOC), Asocijacije nacionalnih olimpijskih komiteta (ANOC), ÖKO ekološkog Instituta iz Njemačke, uz koordinatora Evropski olimpijski komiteti u projektu "OCEAN", koji ima za cilj prvenstveno podizanje svijesti o važnosti utjecaja klimatskih promjena, kako na sport, tako i na život uopće.

Svjesni činjenice da smo u velikom problemu, te da klimatske promjene uveliko utiču, kako na naš svakodnevni život, tako i na sportski svijet, u Briselu se održavaju sastanci, obuke i važna misija za uspostavljanje budućih koraka u rješavanju ove problematike, kojoj u velikoj mjeri doprinosi sam čovjek.

Ne smijemo zaboraviti da sport ima najveći utjecaj, te je upravo ujedinjena ideja da se krene sa realizacijom ovako jednog važnog projekta.

Pratite nas, uskoro vam donosimo nove informacije. Posjetite web stranicu projekta "OCEAN" [OVDJE](#).



**Co-funded by
the European Union**

KICK OFF MEETING PROJEKAT „OCEAN“ OLIMPIJSKI KOMITET BOSNE I HERCEGOVINE U POSEBNOJ OBUCI ZA KLIMATSKE PROMJENE U BRISELU



Sve više smo svjedoci uticaja klimatske krize na planetu zemlju, no da li smo svjesni te činjenice - to je drugo pitanje?

Par činjenica: Prema mišljenju naučnika održavanje globalnog zagrijavanja na razini ispod 1,5 °C najbolji je način za spašavanje planeta od opasnih učinaka klimatskih promjena. Svijet, međutim, trenutno nije na putu prema postizanju tog cilja s obzirom na to da su globalne temperature u porastu.

Prema najnovijem izvještaju Međuvladinog panela o klimatskim promjenama (IPCC) globalno zagrijavanje uzrokuje povećane, a u nekim slučajevima i nepovratne promjene u vezi s obrascima padavina, oceanima i vjetrovima u svim regijama svijeta. U EU-u i širom svijeta sve su češći i intenzivniji ekstremni vremenski uslovi poput toplinskih valova, poplava i šumskih požara, itd. Sve to ima, i imat će velike posljedice na sport, sportska takmičanja, život općenito.

Shodno navedenom, u Briselu se od 21.2. do 24.2. 2023. godine, održavao sastanak partnera i obuka u sklopu projekta "OCEAN" finansiranog od strane EU komisije. Olimpijski komitet Bosne i Hercegovine dio je ovog velikog projekta uz 18 drugih NOC-ova (Nacionalnih olimpijskih komiteta) iz Europe, uz partnere Internacionalni Olimpijski komitet (IOC), Asocijacije olimpijskih komiteta (ANOC), uz partnere "OKO" institut iz Njemačke, institut za primjenjenu ekologiju. Koordinator projekta je EOC (Europski olimpijski komitet).

Važnost i serioznost tematike potvrdili su i čelnici, prisutni, Predsjednik EOC-a, Spyros Capralos koji je govorio o strateškim koracima u vezi klimatskih promjena, Laurence Graff, predstavnik EU komisije koja je prioritetno objasnila zašto je važno djelovati "SADA", predstavnici IOC, Olimpijske solidarnosti, ANOC, te samog ekološkog instituta iz Njemačke, koji su objasnili daljnje posljedice klimatskih promjena na čovječanstvo.

Upravo zbog ozbiljnosti tematike, projekat "OCEAN" je i nastao kao namjera da se kroz sport, kao važan "alat", pokuša ujedinjeno vršiti podizanje svijesti o važnosti teme, te napraviti strateški koraci na nacionalnoj osnovi za njegovo djelovanje. Čovjekov utjecaj na pogoršanje klimatskih promjena je neupitan, te je pored sastanka u Briselu održan i početak obuke za "Climate change officers" ispred EU NOC-ova.

Posebno smo sretni što smo dio velike Olimpijske sportske porodice za rješavanje ovako važnog pitanja kroz projekat "OCEAN" koji će u narednim godinama raditi na suzbijanju čovjekovog uticaja na krizu klimatskih promjena u svijetu.

INTERVJU SA... **ELVEDINOM MUZAFERIJOM**



OK BiH: *Ostvarila si historijski plasman za BiH na utrci Svjetskog prvenstva, kao i spusta u okviru Europa kupa u Švicarskoj, te osvojila i prvu medalju na Europa kupu za Bosnu i Hercegovinu. Kako si se osjećala u tim momentima?*

ELVEDINA MUZAFERIJA: 15. mjesto na svjetskom prvenstvu je nekako došlo baš u pravo vrijeme kada se susrećemo sa problemima diskriminacije manjih skijaških nacija, i smatraju da nam nije tu mjesto. Međutim ovakvi rezultati su dokaz da skijanje nije samo za Austriju ili Švicarsku. Jako sam ponosna da baš ja imam priliku praviti bolji put budućim takmičarima. A drugo mjesto na europskom kupu je možda bilo malo i očekivano jer sam bila dobra i na treningu dan prije, ali utrka je uvijek drugačija i ja sma na zadnjem prolazu bila prva. Međutim mala greška baš pred cilj me je koštala te prve pobjede, ali i postolje za Bosnu i Hercegovinu je jako veliki rezultat, s obzirom da niko do sada nije bio ni blizu ovakvog rezultata. Sretna sam da pišem historiju BH skijanja ali i zimskih sportova.

OK BiH: *Kada to dozvoljavaju obaveze, kako provodiš slobodno vrijeme i sa kim se najviše družiš na treninzima i trkama međunarodnim takmičenjima?*

EM: U skijanju nemate puno slobodnog vremena, posebno dok traje sezona. Ali van sezone sve vrijeme provodim u okviru porodice i bliskih prijatelja. Tokom takmičenja se najviše družim sa curama iz Amerike.

OK BiH: *Elvedina, kakvi su tvoji utisci FIS Evropa kupa na Bjelašnici i kako je skijati na domaćem terenu i pred domaćom publikom?*

EM: Organizacija Europskog kupa na Bjelašnici me pozitivno iznenadila. Pokazali smo da možemo svi zajedno raditi bez obzira iz kojeg kluba dolazimo, i svima je bio cilj da sve prođe kako treba, i mislim da smo uspjeli u tome, posebno nakon reakcija trenera i takmičarki. Svi su jako zadovoljni i raduju se povratku. A što se mene tiče, ja nažalost nisam pokazala skijanje onako kako znam vjerovatno zbog pritiska koji sam osjećala zbog svih navijača koji su došli samo zbog mene ali nadam se da ću naredne godine biti bolja.

OK BiH: *Smatraš li da Bjelašnica može biti destinacija Svjetskog kupa?*

EM: Za Svjetski kup je potrebno još dosta rada, ali mislim da imamo potencijal da održimo utrke spusta i super G u budućnosti, možda za nekih 5-10 godina.

OK BiH: *U kojoj mjeri si zadovoljna ovom sezonom i kakav je plan priprema za predstojeći ljetni period?*

EM: Ova sezona je za mene bila jako teška, s obzirom na sve probleme koje sam imala sa timom i sa trenerima. Na kraju sam izvukla iz sezone najbolje što sam mogla i zadovoljna sam. Sada pravimo novi tim koji će biti uz mene narednu sezonu i već kreću pripreme. Nadamo se da će biti malo više snijega tokom ljeta u Europi da neće biti potrebe za putovanje u Chile ili Argentinu, a onda standardno pripreme u Europi i pred samu sezonu ski kamp u Americi.

STANDINGS

18	+	FLURY	+0.98
19		MIRADOLI	+1.12
20		AGER	+1.22
20		DELAGO	+1.22
22		DURRER	+1.24
23		DELAGO	+1.38
24		HAEHLEN	+1.40
25		MUZAFERIJA	+1.64
25		SCHMIDHOFER	+1.64
27		SUTER	+1.88
28		DOLMEN	+1.99
29		FEST	+2.01
30		KOLLY	+2.61
DNF		ORTLIEB	
DNF		GOGGIA	

SECTORS RANKING

20	+0.11
26	+0.59
27	+0.60
18	+0.34

ELVEDINA MUZAFERIJA BIH 25 +1.64
1:06.37

